

Headlines

- 1 उपराज्यपाल मनोज सिन्हा होरें हाल च होए दे आतंकी हमले बारे गल्ल करदे होई आखेआ जे आतंकवादी हमले च बगे दे खून दी इक इक बूंद दा स्हाब बरोबर कीता जाग।
- 2 प्रधानमंत्री नरेन्द्र मोदी होर कल अपने रेडियो कार्यक्रम मन की बात राएं देश विदेश च रौहने आले लोकें कन्नै बचार सांझे करगंन।
- 3 कुलगाम जिले च इक फौजी गड्डी दे हादसे दा शकार होई जाने कारण इक जवान दी मौत ते 9 जख्मी।
- 4 कश्मीर दे रक्षक ब्रिगेडियर राजिन्द्र सिंह हुंदे शहीद दिवस दे मौके पर उनेंगी भावे भरोची श्रद्धांजलि भेंट कीती गई।
- 5 बीजेपी दे प्रदेश अध्यक्ष रविन्द्र रैणा, पार्टी दे केई लीडरें ते मकामी लोकें अज्ज विलय दिवस दे मौके पर महाराजा हरि सिंह होरें गी श्रद्धांजलि भेंट कीती।

<><><><><><>

LG Sinha

जम्मू कश्मीर दे उपराज्यपाल मनोज सिन्हा होरें अज्ज आखेआ ऐ जे सुरक्षा बलें, आतंकवादिएं आस्सेआ पैदा होआ'रदिएं नमिएं चुनौतिएं कन्नै निबड़ने लेई इक ताजा रणनीति तैआर कीती दी ऐ। कश्मीर घाटी च आतंकवादिएं आस्सेआ मचाई गेदी तबाई च बगे दे मसूम लोकें दे खून दी इक-इक बूंद दा स्हाब लैता जाग। हमहामा च अज्ज बीएसएफ दे 629 रंग रूटें दी पासिंग आउट परेड गी संबोधत करदे होई उपराज्यपाल होरें आखेआ जे भारत सदा गै अपने सब्बने गोआंढिएं कन्नै रमानदारी ते दोस्ताना सरबंध चांहदा ऐ। पर एह इक बड़ी गै मंदे भागें आली गल्ल ऐ जे साढ़ा इक ऐसा गोआंढी ऐ जेहड़ा साढ़े इत्थें बदअमनी फैलाने लेई अपनी पूरी टिल्ल लांदा ऐ, अजें कि ओहदे अपने घर गरीबी ते भुक्खमरी कारण लोक मते परेशान न। उनें आखेआ जे जम्मू कश्मीर च आतंकवाद दा समूलचा नास करने लेई पुलस, फौज ते होरने केन्द्री बलें गी किट्ठे रलियै कम्म करना होग।

<><><><><><>

BSF Anti Infiltration

सीमा सुरक्षा बल कश्मीर फ्रंटियर दे आईजी अशोक यादव होरें मीडिया कन्नै गल्लबात च दस्सेआ जे नियंत्रण रेखा पर घुसपैठ विरोधी बवस्था बड़ी मजबूत ऐ ते स्याले दे मौसम शा पैहले घुसपैठ दी कोशशें गी सुरक्षाबल नाकाम करगंन। गांदरबल ते गुलमर्ग च हाल च होए दे आतंकवादी हमले गी कायरतापूर्व दस्सदे होई उनें आखेआ जे सुरक्षाबल चुनौतिएं दा विश्लेषण करा दे न तां जे भविक्ख च उनेंगी रोकेआ जाई सकै।

<><><><><><>

Baramulla Attack

जम्मू कश्मीर दे गुलमर्ग इलाके च जंदे रोज होए दे आतंकी हमले जेहदे च दऊं सैनिक सनें कुल 5एं दी जनें दी जान चली गई ही, मन्नेआ जा'रदा ऐ जे इस आतंकी वारदात गी अंजाम देने च कोई 3 जां 4 आतंकवादिएं दा हत्थ हा। हमलावर आतंकवादिएं गी तुप्पी फगड़ने लेईं तुपाई अभियान अज्ज दुए रोज गी जारी ऐ। तुपाई आली कारवाई च पुलस, फौज ते नीम फौजी बल शामिल न। तुपाई अभियान दा दायरा बाबा रेशी ते गुलमर्ग दे घने जंगली इलाके तोड़ी बधाई दित्ता गेआ ऐ जेहड़ा पैहले शड़ा रिहायशी ते निर्माण आले इलाके च चलाया जा'रदा ऐ। सरबंधत एसएसपी आस्सेआ दित्ती गेदी जानकारी मूजब होई सकदा ऐ जे आतंकी जंगली इलाके च बड़ी गेदे होन। शुक्रवारें सुरक्षा बलें नियंत्रण रेखा दे अलावा आले दोआले दे इलाके च बी ड्रोन दी मदद कन्नै आतंकवादिएं दी तुपाई करना शुरू करी दित्ता हा।

<><><><><><>

Man Ki Baat

प्रधानमंत्री नरेन्द्र मोदी होर कल आकाशवाणी दे मन की बात प्रोग्राम च देश प्रदेश च रवा'रदे लोकें कन्नै अपने बचार सांझे करगंन। एह इस रेडियो प्रोग्राम दी 115मीं कड़ी होग। प्रोग्राम दा प्रसारण आकाशवाणी ते दूरदर्शन दे पूरे नेटवर्क एयर न्यूज़ वैंबसाईट ते न्यूज़ ऑन एयर मोआइल ऐप उप्पर होग। एहदे इलावा आकाशवाणी ते डीडी न्यूज़ दे यूट्यूब चैनलें उप्पर एहदा सिद्धा प्रसारण कीता जाग। आकाशवाणी प्रोग्राम दा क्षेत्रीय भाषा च अनुवाद हिंदी प्रसारण दे तुरत परैत करी देग।

<><><><><><>

Accident

कुलगाम जिले च सेना दी इक गड़्डी दे हासदे दा शिकार होई जाने कन्नै इक जुआन दी मौत होई गई ते 9 जख्मी होई गे। एह हादसा कल चिरे रातीं दमहाल हांजीपुरा इलाके च होआ, जिसलै सेना दी गड़्डी गश्त करा'रदी ही ते रूलकियै 50 फुट्ट डूंहगी खाई च डिग्गी गई। हादसे च इक मेजर सनें 10 सैन्यकर्मी जख्मी होए। पुलस ते सेना नै तुरत राहत अभियान चलाया ते जख्मिं गी अस्पताल पजाया।

<><><><><><>

Martyrs Day(byte)

महावीर चक्र कन्नै सम्मानित शहीद ब्रिगेडियर राजिन्द्र सिंह हुंदे शहीदी दिवस दे मौके पर अज्ज केई कार्यक्रमें दा सरिस्ता कीता गेआ। कश्मीर दे रक्षक खेआने आले ब्रिगेडियर राजिन्द्र सिंह 1947 च 21 अक्टूबर कोला लेइयै 26 अक्टूबर जोड़ी बक्ख-बक्ख मोर्चे पर पाकिस्तान फौज दे कबाइली हमले दी शकली च कीते गेदे हमलें गी नाकाम कीता। पाकिस्तान दी तरफा चानचक्क कीते गेदे हमले दे दरान महाराजा हरि सिंह हुंदे निर्देश परबड़े घट्ट सैनिकें कन्नै ज्हारा बद्धे पाकिस्तानी हमलावरें गी रोकेआ ते इक दे बाद इक उंदे केई हमलें गी नकाम कीता ते जम्मू कश्मीर दी रक्षा कीती। 26 अक्टूबर दी रात वीरगति गी प्राप्त होए ते 27 अक्टूबर गी भारतीय फौजां हीरानगर च उतरियां ते पाकिस्तानी हमलावरें गी पिच्छे धक्कदे होई वापस नस्सने पर मजबूर करी दित्ता। जम्मू दे राजिन्द्र सिंह चौक च लोआए गेदे इक श्रद्धांजलि समारोह च कर्नल एस.एम.सहाय होरें आखेआ

<><><><><><>

Accession Day

सांबा च भारतीय जनता पार्टी आस्सेआ समूलचे जम्मू कश्मीर आंगर अज्ज विलय दिवस मनाया गेआ। सांबा बीजेपी मुख्यालय च अंतिम डोगरा शासक महाराजा हरि सिंह जी होरें गी श्रद्धांजलि भेंट कीती गई। आकाशवाणी कन्नै गल्लबात च उमएलए विजयपुर चन्द्र प्रकाश गंगा होरें आखेआ

उधमपुर च बी बीजेपी नै विलय दिवस मनाया। अज्जै दिन 1947 च भारतीय सेना जम्मू कश्मीर चउतरी ही, जेह्दे मगरा डोगरा शासक महाराज हरि सिंह होरें विलय पत्र पर दस्तखत कीते। बीजेपी दे प्रदेश प्रधान रविन्द्र रैणा ते दुए वरिष्ठ नेताएं ते वर्करे, आम शैहरदारें दी मजूदगी च महाराजा हरि सिंह होरें गी श्रद्धांजलि भेंट कीती। रविन्द्र रैणा होरें आकाशवाणी कन्नै गल्ल करदे होई आखेआ

<><><><><><>

Diwali(byte)

देसै दे बाकी हिस्सें आला लेखा जम्मू कश्मीर च बी देयाली दियां तैआरियां जोरें शोरें घरे दी सजावट, अपनी खरीददारी ते देयाली दे तोहफे उपहार खरीदने च रूल्झे दे न। उत्थें गै केई लोक पारंपारिक ढंगै नै देयाली मनाने गी बढ़ावा देआ'रदे न। रियासी जिले पर्यावरण दे अनुकूल दीए बनाने दा चलन मता मशहूर होंदा जा'रदा ऐ। केइए पीढ़िएं थमां मिट्टी दे भांडे ते होर दुआ समेयान तैआर करने आले कमैहर इनें दिनें मिट्टी दे दीए तैआर करने च रूल्झे दे न। रियासी च दीए बनाने आले इक कारीगिर राम स्वरूप नै साढ़े जिला संवाददाता देवेन्द्र ठाकुर कन्नै गल्ल करदे होई आखेआ जे ऐकती उनेंगी 20 ज्हार दीए बनाने दा आडर थ्होआ ऐ

<><><><><><>

India-Pakistan-UN

भारत नै संयुक्त राष्ट्र सुरक्षा परिषद च पाकिस्तान दी निंदेया कीती ऐ ते कश्मीर दा पुट्टने गी दुश्प्रचार फैलाने दा ओहदा पुराना उसकाने आला तरीका दस्सेआ ऐ। संयुक्त राष्ट्र सुरक्षा परिषद च बदलदे परिवेश च शांति कायम करने च महिलाएं दी भूमका बारे इक चर्चा च भारत नै परता देने दे अपने अधिकार गी बरतदे होई पाकिस्तान च अल्फसंख्यक समुदाय दी महिलाएं दी दयनीय हालत लेई इस्लामाबाद दी निंदेया कीती। न्यूयार्क च संयुक्त राष्ट्र च भारत दे स्मार्ट नुमायंदे परवथानेमी हरिश होरें आखेआ जे पाकिस्तान च महिलाएं दी माड़ी हालत पर बोलने दी थाहर ओहदा प्रतिनिधिमंडल झूठा प्रचार करने दे पराने रवैये पर कायम ऐ। हरीश होरें शांति मिशनं च भारत आस्सेआ महिलाएं दी नुमायंदगी बधाने ते महिला शांतिकर्मिं दी समर्थ बधाने दे जतनें दी जानकारी दित्ती।

<><><><><><>

Data Extended

परतक्ख कर यानि डरैक्ट टैक्स सरबंधी बोर्ड सीबीडीटी नै कारोबारी करदाताएं लेई 2024–25 आले आंकलन ब'रे लेई इंकम टैक्स रिटर्न भरने दी खीरी तरीक अगड़े बधाई दित्ती ऐ। खीरी तरीक जेहड़ी पैहले 31 अक्टूबर रखी गेदी ही, उसी हुन 15 दिन होर बधाइयै 15 नवम्बर करी दित्ता गेआ ऐ।

<><><><><><>

Age Registration

जम्मू कश्मीर दे साबका शिक्षा मंत्री ने वरिष्ठ पीडीपी नेता नईम अख्तर होरें जम्मू कश्मीर कंगाइंड कंपीटीशन एक्जेमिनेशन लेई आयु सीमा पर चिंता बुज्झी ऐ। उने जेकेपीएससी आस्सेआ बद्धोबद्ध आयु सीमा पर ब'रे सब्बने दी निंदेया कीती। प्रदेश दे नोजवानें कन्नै बे-न्याई दस्सेआ। उनें आरोप लाया ते होरने राज्यें च लोक सेवा अयोग्यें बद्धोबद्ध आयु सीमा मती रखी दी ऐ जदके जम्मू कश्मीर च घट्ट ऐ।

<><><><><><>

Weather

मौसम विभाग आस्सेआ दित्ती गेदी जानकारी मूजब जम्मू च अज्ज दिने दा बद्धोबद्ध तापमान 32 डिग्री सैल्सियस जिसलै जे चंदी रातीं दा घट्टोघट्ट तापमान 15.6 डिग्री सैल्सियस रिकार्ड कीता गेआ।

<><><><><><>